

AHLAN WA SAHLAN YA RAMADHAN

Unit HELWA dan Portal PBMSK, UMP

Ramadhan dan Taqwa

BY HUSNA HASHIM

Ramadan bertamu lagi tahun ini, 1440H. Alhamdulillah segala puji bagi Allah yang memberi kita peluang bertemu Ramadan untuk sekian kalinya dalam hidup yang tidak kita ketahui bila penghujungnya. Ramadan, bulan yang dimuliakan Allah dengan memfardhukan ibadah puasa. Allah befirman didalam surah al-Baqarah: 183 bahawa ibadah puasa difardhukan keatas orang-orang yang beriman dengan satu objektif yang jelas iaitu membentuk diri menjadi insan yang bertaqwa. Puasa dinyatakan sebagai satu latihan intensif yang direncanakan oleh Allah SWT untuk melatih hamba-hambanya mencapai martabat taqwa. Apakah yang dimaksudkan dengan taqwa? Bagaimana ibadah puasa membuahkan hasil taqwa?

Definisi taqwa:

Sayidina Ali RA berkata: "Takwa ialah takut kepada Tuhan yang mulia, beramal dengan kitab yang diturunkan. Redha dengan sedikit dan bersiap sedia untuk hari kesudahan."

Ibn Ataillah Rahimahullah berkata: "Takwa terbahagi kepada dua, iaitu zahir dan batin. Zahirnya ialah dengan menjaga had dan batasan serta batinnya pula dengan niat dan ikhlas."

Abdullah bin Mas'ud R.A mengatakan: "Takwa adalah kamu sentiasa mengingati Allah SWT dan tidak melupakannya, dipatuhi dan tidak diderhakai, disyukuri dan tidak diingkari."

Boleh disimpulkan bahawa martabat taqwa diperolehi oleh sesiapa yang melaksanakan segala perintah Allah SWT. serta menjauhi segala laranganNya dengan penuh ketaatan dan keikhlasan.

Puasa bermaksud menahan diri daripada makan dan minum serta perkara-perkara yang membatalkan puasa dari terbit fajar hingga terbenam matahari yang disertai dengan niat. Ibadah puasa melatih jiwa seseorang mencapai taqwa kepada Allah dengan meninggalkan keinginan-keinginan yang harus, semata-mata kerana patuh kepada perintah Allah SWT dan mengharapkan ganjaran baik dari sisiNya. Apabila jiwa orang yang berpuasa terdidik meninggalkan perkara-perkara yang asalnya harus dilakukan semata-mata taat kepada perintah berpuasa, maka menjadi mudah baginya meninggalkan segala perkara yang diharamkan dengan penuh kesabaran kerana taat kepada Allah SWT. Justeru lahirlah sifat taqwa pada jiwa seorang mukmin dalam bentuk melaksanakan ketaatan dengan penuh kesabaran dan ketekunan.

Ibadah puasa bukanlah menyiksa jiwa dan tubuh badan seorang mukmin, tetapi puasa mendidik dan menyucikan jiwa. Seorang mukmin yang berjaya menyucikan jiwanya akan benar-benar mencapai martabat taqwa. Tubuh badannya mudah melaksanakan perintah Allah dan meninggalkan laranganNya, hatinya tenang dan bahagia menjalani kehidupan walaupun dihambat pelbagai ujian dan cabaran. Inilah kejayaan sebenar bagi seorang mukmin yang menjalani ibadah berpuasa di bulan Ramadan dengan sempurna.

Ramadhan Checklist

BY EZIHASLINDA NGAH



The month of Ramadhan is like a spiritual journey for all Muslims. Before embarking on any journey, travelers usually prepare or equip themselves with necessary items to ensure the smoothness of the journey. Similar to physical journey, this wonderful journey of our souls for the whole month of Ramadhan may be guided by our very own achievable Ramadhan checklist. The checklist can be anything which suits us the best. We may start with a very simple task and develop it on day to day basis. Here are some of the activities or tasks which we can try to do throughout Ramadhan and in shaa Allah some of them may be continued even after Ramadhan. Some suggestions for us all to do are:

- Perform night prayers/qiamullail
- Tadarrus/read/review quran daily
- Made istighfar 70-100 times daily
- Recite salawat 100 times daily
- Perform taraweeh prayers
- Give charity/sadaqah
- Prepare dua list for myself, family and ummah
- Perform 5 prayers on time
- Do not argue/gossip/backbite
- Say four things in abundance: Laa Ilaaha illAllah; Astaghfiru'llaah; Allahumma innii As aluka'l-jannata Wa A'uzu bika mina'n-Naar (There is none worthy of worship except Allah!; I beg You for Your forgiveness; Oh Allah, I beg You for entrance into Paradise and I seek refuge in You from falling into Hellfire).

Tadarus Al Quran

BY FARAH FARHANI WAN ZIN

Pengertian

Tadarus Al-Qur'an, pada dasarnya bermaksud membaca Al-Quran di hadapan seseorang yang dapat mengawasi bacaan itu daripada sebarang kesilapan. Amalan tadarus merupakan salah satu ibadat penting yang diberi tumpuan oleh Rasulullah s.a.w. dalam bulan Ramadhan.

Unit HELWA pada tahun ini tidak melepaskan peluang untuk menjayakan program Tadarus di bulan Ramadhan. Program Tadarus Al-Quran juga dapat menimbulkan kesedaran agar tidak mengabaikan tanggungjawab sebagai seorang muslim dan memantapkan kemahiran membaca Al-Quran dalam diri setiap insan.

Cara Tadarus

Tiada cara yang seragam atau tertentu dalam aktiviti tadarus Al-Qur'an. Bagaimanapun Unit HELWA telah membahagikan staf kepada beberapa kumpulan di Gambang dan Pekan dengan pembahagian juzuk bagi memudahkan aktiviti tadarus dijalankan.

Adab Membaca Al-Qur'an

Ketika membaca Al-Quran, terdapat beberapa adab yang perlu diutamakan antaranya:

1. Suci daripada hadas besar dan kecil.
2. Duduk dengan sopan dan menghadap kiblat.
3. Membaca secara tartil.
4. Membaca dengan melihat mashaf (مصحف) lebih afdhil.



Bersambung di muka seterusnya ->

Kelebihan Tadarus:

Tadarus Al-Qur'an mempunyai banyak kelebihan.

Antaranya, sabda Rasulullah s.a.w. bermaksud:

“Tidak berkumpul suatu kaum pada mana-mana rumah Allah, mereka membaca dan bertadarus Al-Qur'an, melainkan diturunkan kepada mereka ketenangan (sakinah), diliputi rahmat, dikelilingi malaikat dan Allah menyebut mereka pada para malaikat”.

(Riwayat: Abu Daud).



Aktiviti tadarus

1. Membaca Al-Qur'an secara bergilir-gilir dalam suatu kumpulan kecil.
2. Membaca mengikut tertib surah dan ayat, sebagaimana dalam mashaf
3. Menyemak bacaan agar selamat daripada kesalahan tajwid dan sebagainya.
4. Baca dengan niat untuk mendekatkan diri kepada Allah bukan untuk segera khatam.

Tadabbur

BY ANITA ABDUL RANI

Surah Al-Hujurat

Surah Al-Hujurat merupakan surah ke 49 dalam susunan Al-Quran dan hanya mempunyai 18 ayat.

Surah ini diturunkan di Madinah yang mengandungi banyak pengajaran dalam hidup. Syed Qutb dalam huraianannya dalam Kitab Fi Zilaalil Quran membahagikan tafsiran kepada beberapa topik iaitu:

- Adab orang beriman dengan Rasulullah SAW
- Mencari kebenaran berita yang diterima
- Bersikap damai sesama manusia
- Larangan bersikap angkuh, prasangka dan mengumpat
- Orang yang paling mulia adalah yang paling bertakwa
- Hakikat iman dan pengukuhanannya

Dalam kita berinteraksi dengan manusia Dr Kamilin Jamilin menyenaraikan 9 adab untuk berinteraksi dengan manusia.

Adab 1 pada Ayat 6: Selidik suatu khabar yang sampai padamu.

“Wahai orang-orang yang beriman! Jika datang kepada kamu seorang fasik membawa sesuatu berita, maka selidikilah (untuk menentukan) kebenarannya, supaya kamu tidak menimpakan sesuatu kaum dengan perkara yang tidak diingini - dengan sebab kejahilan kamu (mengenainya) - sehingga menjadikan kamu menyesali apa yang kamu telah lakukan.”

Adab 2 dan 3 pada ayat 9: Damaikan saudara yang bersengketa dan berlaku adil.

“Dan jika dua puak dari orang-orang yang beriman berperang, maka damaikanlah di antara keduanya; jika salah satunya

berlaku zalim terhadap yang lain, maka lawanlah puak yang zalim itu sehingga ia kembali mematuhi perintah Allah; jika ia kembali patuh maka damaikanlah di antara keduanya dengan adil (menurut hukum Allah), serta berlaku adillah kamu (dalam segala perkara); sesungguhnya Allah mengasihi orang-orang yang berlaku adil.”

Adab 4, 5, dan 6 pada ayat 11 : Jangan mencemuh/merendahkan orang lain, Jangan mengaibkan.

“Wahai orang-orang yang beriman! Janganlah sesuatu puak (dari kaum lelaki) mencemuh dan merendahkan puak lelaki yang lain, (kerana) harus puak yang dicemuhkan itu lebih baik daripada mereka; dan janganlah pula sesuatu puak dari kaum perempuan mencemuh dan merendahkan puak perempuan yang lain, (kerana) harus puak yang dicemuhkan itu lebih baik daripada

Bersambung di muka seterusnya ->



mereka; dan janganlah setengah kamu menyatakan keaiban setengahnya yang lain; dan janganlah pula kamu panggil-memanggil antara satu dengan yang lain dengan gelaran yang buruk. (Larangan-larangan yang tersebut menyebabkan orang yang melakukannya menjadi fasik, maka) amatlah buruknya sebutan nama fasik (kepada seseorang) sesudah ia beriman. Dan (ingatlah), sesiapa yang tidak bertaubat (daripada perbuatan fasiknya) maka merekalah orang-orang yang zalim.

**Adab 7, 8 dan 9 pada ayat 12 :
Jauhi dari banyak berprasangka
buruk, Jangan mencari-cari
kesalahan orang lain dan Jangan
mengumpat.**

Wahai orang-orang yang beriman! Jauhilah kebanyakan dari sangkaan (supaya kamu tidak menyangka sangkaan yang dilarang) kerana sesungguhnya sebahagian dari sangkaan itu adalah dosa; dan janganlah kamu mengintip atau mencari-cari kesalahan dan keaiban orang; dan janganlah setengah kamu mengumpat setengahnya

yang lain. Adakah seseorang dari kamu suka memakan daging saudaranya yang telah mati? (Jika demikian keadaan mengumpat) maka sudah tentu kamu jijik kepadanya. (Oleh itu, patuhilah larangan-larangan yang tersebut dan bertaqwalah kamu kepada Allah; sesungguhnya Allah Penerima taubat, lagi Maha mengasihani.

Semoga kita dapat menghayati dan mengerjakan 6 suruhan Allah dan meninggalkan 3 laranganNya dalam surah ini. Surah ini diakhiri dengan ayat peringatan untuk kita iaitu:

"Sesungguhnya Allah mengetahui segala rahsia langit dan bumi, dan Allah Maha Melihat akan segala yang kamu kerjakan".

Glosari

BY HUSNA HASHIM

Orang beriman menerima kedatangan Ramadan dengan penuh gembira. Mereka saling berbalas ucapan memuji Allah dengan kedatangan Ramadan.

Ucapan yang biasa digunakan ialah:

رمضان كريم

Ramadan Kareem

Ramadan yang mulia

Ucapan balasnya ialah:

الله أكرم

Allahu Akram

Allah yang Maha Mulia

Kemuliaan Ramadan antaranya ialah:

- 1) al-Quran diturunkan di bulan Ramadan.
- 2) ibadah puasa disyariatkan pada bulan Ramadan.
- 3) ada satu malam yang istimewa lebih baik daripada seribu bulan - Lailatul Qadr.
- 4) pahala kebaikan dilipat gandakan.
- 5) bulan penuh keberkatan, rahmat dan kebaikan.